

40693

共24册



吾學編序

自昔人第立書興立

德立功爲三不朽於

是誦法孔子者知所

以修詞矣然言不足

以明性道紀典故兀

兀窮年取楚騷漢文
唐律而模擬之求工
於一字一句以炫人
而無補於世用少知
懲其弊者又竊佛經
上乘之旨以附濂洛

主靜工夫而千言萬
語終虧實踐將孔子
所以刪述六經爲萬
世標的者固如是耶
予學術寡陋濫通朝
籍伏念生逢

聖世當究心

昭代典故前修得失庶取
則不遠聞太子少保
澹泉鄭端簡公崛起
鹽官以博洽伏宇內
心切識之及徼天幸

與公同在銓司每政
暇彼此輒以所撰述
相質見公所編吾學
總目叙自戊申年

太祖混一區夏握符御極
改元洪武歷永樂洪

熙宣德正統景泰天
順成化弘治正德凡
關係大政者倣朱子
綱目以歲係月各爲
一記建文四年雖革
除殘缺亦搜集遺文

拆爲遜國記至於同
姓諸王分封列藩及
開國靖難禦胡勦寇
并戚畹佞幸列爵三
等者各爲表傳別功
罪爲萬世勸懲又表

內閣以崇政本表太
宰以重銓衡紀文武
名臣以垂景範紀遜
國諸臣以獎忠義述
天文地理以嚴修省
辨經略述三禮百官

以秩祀典別職掌考
四夷北虜以通正朔
飭邊備俱原本始核
事情於予心若相契
者時全書未成期日
後彼此攷訂以竟初

志及公任大司寇南
歸予猶久掌邦土無
緣質公於鹽官故里
迺公忽先予逝囑子
履淳履準履洵以成
書付梓求序於予予

嘗閱南史稱顧野王
撰國史記傳及輿地
志而江南典故章文物
賴之以存公潛心世
故殫平生精力使
昭代二百年行事實跡萃

於一旦足以龜鏡後
來不徒備江南一方
文獻而已矧禊身澡
行不愧屋漏而保釐
江淮掃定倭寇與夫
天曹之秉公京營之

祛弊刑部之敬慎俱
焯然爲朝紳所景仰
較之襲縟辭侈清談
於理道無補者何啻
徑庭也予慶公素履
定蓋棺已列不朽之

林因序於編端不知
踈陋所撰亦能補公
於萬一矣乎

隆慶元年季春吉日
賜進士第光祿大夫柱
國少傅兼太子太傅

工部尚書前都察院
右都御史豐城雷禮
序

重刻吾學編跋

自余有識時間掣稽
昭代典章於少保端簡鄭
公吾學一編拳拳已
比薄游兩都則都人
逞逞有購是編不得

者蓋一家之藏故不能盡副通都也歲乙未余筮爲鹽官詢知其書浸已磨剝幾不可校甚患之間嘗言之胤君心材至己亥

則已還復舊觀而眊昔工矣泰竊惟古今之以著述名家者在漢夏陽扶風各世濟其美令談不得遷彪不得固弗傳也端簡

公之於是編蓋傳於
其長公光祿勳云廼
今紹明其業俾弗終
磨剝至不可校者尤
胤君力也胤君旣已
紹明其業還復舊觀

已顧獨進不佞問序
焉而以後於大司空
豐城雷公余自維生
也晚愧不敢當顧不
幸不見端簡公而幸
讀其書見其冢孫則

何敢讓因竊槩於吾
學之義而爲之說也
曰成周之際自太史
下至小行人皆掌官
府之書至備矣典墳
丘索與外史並垂宣

聖悉刪去之而維周
之從至今周禮炳于
日星寧獨時王制也
郁郁其文舍周何適
是編所記大政髣髴
見

祖

宗劬守鴻規竝徽雒鎬於
爍哉他如傳表所撰
次直以游乎夏陽扶
風之奧至其丕揚
晟禩光叙范模安在

非元本

神聖竊比從周也漆園氏
之言曰詩書禮樂鄒
魯之士縉紳先生能
明之卒思其闇而
明鬱而不發也始是

編出而人知鄒魯鹽
官矣再世而得胤
而後是編爲不朽余
不佞何幸逢其盛焉
爰跋數言以識歲月
萬曆己亥浴佛日

曠城後學李當泰頓
首謹跋

序略

古之作者必無係不羈之才胷中本有全書而弗
得試乃著述以自見丘明司馬皆才兼文武人豪
也彼其所蘊如日月有明雲寧終掩江河有性土
可終湮不宣於此則呈於彼不霖雨乎當時自山
斗乎來世天之所賦非偶然豈但泯焉耳已先君
幼學卽志四方無書不讀所讀必可裨用少壯入
仕益諳我典常質彼文憲耳目見聞咸一知之博
古則約其精徵今則核其備人文淵藪國是著龜
麗埒班揚志凌屈賈叩之驚焉其多聞何便便有條

也稿未竟嘉靖丙辰太宰古冲李公爲趙訐奏論
死翁震懼曰古以言殺身况成書乎悉畀火孤固
請秘之弗得遂竊小櫝藏之述古獨餘古言蓋千
百之一今書存失相等逮歲壬戌孤請告歸始以
殘帙白翁成志喟然歎曰嗟夫此稿尚有存乎予
行藏勲業盡於此而所存僅此乎遂略以今書倫
次補輯弟準天資絕人先君口相証授準多代筆
又三年始付梓梓方半翁遽長逝嗚呼痛何如哉
胡天不使此書盡試諸用又不使翁一覽全刻而
徒留此空言欲以何明也翁蘊全才而不大任亦

云爲兆震厲睽孤憂國衛身艱險歷備勁節雖完
精力竭矣玄珠寂寞白璧幽淪光在山川天真寧
遇是迺旁觀宇內違駕初服惜繁華之易零念弘
圖於不朽盤桓憤激委約飛文竊職掌於史官謹
權衡於獨斷危詞隱義遠略壯猷觀是書可知是
人契是心殆有周駕八荒彌綸千古之致豈徒一
世士區區文藝名也噫邈此生民以來凡彼玉質
金相英髦秀達道亞生知時不我與湮滅無聞安
可勝悼夫太上以德鮮矣流形大塊而一無可傳
非夫也可傳在我而其存與熄則命也黃梁得喪

青史是非聖人復起賢愚有定豈其幸與不幸果
可誰欺與故曰其位可卑其身可死其言立遂與
天地相終始貧富貴賤壽夭同之然蔡柳奇葩名
常爽實機雲高譽知不逮言亦或文以人傳人由
文顯兼茲無愧允爾才難若先君所不能全殆惟
壽耳使無是書果將同凋草木矣乎抑嘗聞作易
之有憂患王通以爲畏天憫人思及時而動深知
易矣動而不時則冒耻於行露比而入於蹇時而
弗動則泥類於匏瓜節而至於屯潛躍有具用舍
惟時庶亡悔吝而周公孔子之教此其最要先君

率爾成書豈希贊易之心乎終焉憂患未釋而腹
書以沒丘園信乎命實爲之雖聖哲無如之何宜
昔人之染翰慷慨屢伸而不能已者也去我英雄
遺編故屋承顏寤寐猶恍傳心音容杳冥誰能不
隱雖違伯樂會有子期撫卷徘徊風雲蕭瑟向之
七略成於歆先君精忠邃學無愧於向惜子非劉
歆殘缺莫補條具如左叅詳潤色尚俟後之君子
云

維皇開泰新制正經親賢和衆萬國以寧聖子神
孫與治同興昭哉祖武萬世允繩記大政 第一

江左肇基非國上游龍飛北固鶴返丹丘漢文天
授少帝何尤慨彼黍離爰諱乾侯記遜國 第二
堯稱既睦周作方來富之不費貴之無猜勢以時
異恩以禮裁均奠磐石藩翰九垓傳同姓諸王
第三
永清九有實賴虎臣報功崇德分券圖麟德薄位
尊或覆厥身韓彭絳灌全毀由人傳異姓諸侯
第四

三公論道致主調元秩有等殺職共斯言爰立無
方考慎台垣一人進退治忽攸源表閣臣 第五

巍乎冢宰百官之表責在進賢決彼羣小告自乃
邑休休皎皎吏治澄清兆民斯擾表典銓 第六
無競維人萬方之望克展其猷知恤在上猗我多
賢爲周孚倡爰條晁董以俟魏相記名臣 第七
成仁取義人臣之信寧爲祭犬不事堯舜心協三
仁黨凌八俊立懦廉頑名教丕振記遜國臣 第
八

星家考驗代有程章玄機杳默固矣梓萑無災可
懼有災亦昌誠身省躬實應之常述天文 第九
天子無外莫不尊親廣土非寶寶在裕民聚人以

財守財以人得彼猛士慎固咸賓述地理 第十
舜嚴降格說戒弗欽神無私享明德惟馨敦此仁
孝率義推心必躬必敬昭格咸臨述三禮 第十

一 官代天工惟民之極睿制曲防綱維以則擇人乃
昌擇官斯忒敬事君子慎思厥職述百官 第十

二 要荒服夏蕃鎮承周炎風朔雪孰匪受球摠攬乾
綱余宋長猷王者不治亦曰懷柔考四夷 第十

三 北門勁寇郊畿接壤人由我益地由我廣茲備將
來盍懲既往鎖鑰得司不兵而攘考北虜 第十

四 實錄果可傳信乎前賢論喻詳矣野史散雜無
統又未足盡馮也故必凌雲御日之才博洽淹
貫分明經緯恍兮身處當時目見往事非若班
氏以後轉相蹈襲乃能會為全史昭不朽之烈
垂不刊之典先君嘗志於此惜乎始懲李禍終
促遐齡偉作弗全英豪留恨今梓惟大政記放
朱子綱目及本紀然綱且未敢備况目乎非是

無以首卷通達者當意會遜國特述故事以續
編年王侯放十表翁序詳之閣臣典銓感時作
也爲臣不易況心腹股肱哉記名臣放列傳也
論旨深遠遷史下無及者天下何時無才能盡
其用有幾然亦自不可泯觀遜國諸臣尤見盛
世人性之善超越千古三禮天官皆諷諫也禮
書所載禮之爲用大矣寧獨祀事舉時要耳天
官亦然是以全樂公之疏也述百官以明職掌
今有官君子皆能不曠此乎庶政和而萬國寧
矣地理夷官北虜先君初官職方最所究心非

昔志輿地比也歌六月詩讀李翱文始知公忠
愛無窮爽然有封狼居胥意是凡十有四篇其
事皆有司存翁非立本朝贊國均而陳此經世
之書如出位之誚何雖然以此罪翁亦或以此
知翁百世之下應有心契於形迹之外而諒此
勤勤之衷者固非翁及諸孤所敢豫計也此卽
所存今書之半翁各自爲小序其女后樂律儀
制兵略茶馬鹽糧運法水利藝文隱逸酷佞方
技等傳皆廢丙辰翁且謂應有紀之勿復更補
然上下二百年間典章成憲大要畢具忠臣持

以事君志士懷以籌務咸此依循免面墻矣嗚呼若斯之人而天奪之速豈獨孤之失所怙哉外今言徵吾諸錄各自爲集不復附此

不肖鄭履淳謹識孫鄭心材重校

鄭端簡公吾學編引

先君非功名士也富貴云乎哉有嘉言善行而不
得播聞人子之罪也况勤著作以經世務裨

聖化者而翁彌留又惓惓顧托言猶在耳忍不終
其志廣其傳翁方見梓之半而孤忽罹大戚匍匐

顛

闕

聖恩優渥褒恤殊章孤藉前休復蒙錄廕榮哀旣
備功賞世延實賴

天上臯夔情見生死誼公衡鑒

吾學編 五
恩雖倖致望愜羣心感荷徒殷不知所以爲報也
隆慶紀元五月甲戌抵舍仍侍几筵曠違條已更
歲依依當時瞻戀而音容杳然一檢遺編惡緒紛
雜嗚呼翁何如人也乃遽至此哉翁身可死而有
不可朽者惟此書耳予兄謂翁之書未盡其學翁
之用未盡其書旨深遠矣翁自丙辰每得一稿卽
呼兄弟示之又必曰準校梓勿失也孤故獨藏所
刻吾學編六十九卷徵吾錄二卷文集年譜未竟
共板四千有奇布帛之文精神之聚衡門泌水之
經綸固非特湘臣洛士之詞賦已也凡翁子孫永

宜世守翁嘗命旣梓但刷千冊卽毀板或畀書肆
予終身清介遺子孫安毋以書勞後人嗟乎沒身
猶計燕翼而爲翁子者僅此遺書弗能守耶
達尊親友諒此他日借板不能奉命幸勿我罪翁
著述之富冠當時可梓豈獨止此予兄諸序詳之
其今言古言及舉子諸書數十百卷已有傳者勿
識也

不肖鄭履準謹書

皇明大政記序

大政記者記政之大者也政必端大本審大
機建大法係此小事必書否雖大勿錄也恭
惟我

朝文謨武烈不顯不承

聖子神孫善繼善述巍巍二帝之治郁郁三代之
文倬彼典常允宜師守顧洪猷浩蕩玉籍淵
珍莫罄名言孰諳成憲予翁淹貫通達推絕
一時雖職非史官而光昭

先皇令德以垂多士儀刑與人爲善之心不敢諱

况切雲霖雨之志而徒老投閒今衰已甚爰放編年陳茲大典庶使後之佐孝宣者有所依繩而頌慶曆者咸此考據且知翁精誠之運周旋

二祖

列宗左右也

嘉靖丙寅二月朔

賜進士第觀吏部政

臣

鄭履淳拜手稽首謹識

吾學編篇目

大政記十卷

遜國記一卷

同姓諸王表二卷傳三卷

附異姓三王孔氏世家

異姓諸侯表一卷傳二卷

直文淵閣諸臣表一卷

兩京典銓表一卷

名臣記三十卷

遜國臣記八卷

天文述一卷

地理述二卷

三禮述二卷

百官述二卷

四夷考二卷

北虜考一卷

凡十有四篇為卷六十有九 篇首序跋略

引目共二十三葉每篇有小序卷末有後序

重刻後語

孫心材重校

皇明大政記第一卷



吾學編第一

臣海鹽鄭曉

戊申大明太祖高皇帝洪武元年春正月乙亥即皇

帝位○追尊四世考妣為皇帝皇后立妃馬氏為

皇后世子標皇太子○戊寅居新宮○征南大將

軍湯和克延平執陳友定○宣國公李善長信國

公徐達為左右丞相章溢劉基御史中丞○省府

請皇太子為中書令不許令廷臣勲德老成者兼

東宮官○建南北郊太社稷○是月天下官來朝

○二月湯和提督海運○征南將軍廖永忠副將

軍朱亮祖平福建進取廣東○以太牢祀先師孔子于國學○定宗廟時享禮○禁胡服胡語胡姓○定賦法役法○三月彗星見昴○征虜大將軍徐達取汴梁河南○夏四月將軍鄧愈取南陽諸郡○永忠師至東莞元廣東守臣何真降○汪廣洋陶安爲山東江西叅政○改太史院爲司天監○五月庚寅帝至汴梁○徵天下賢才爲守令○六月達朝行在令率諸將取元都○秋七月永忠取廣西○賑恤中原○帝還京右副將軍馮勝守汴梁○閏七月達會兵于臨清進克通州乙丑元

主走上都○八月詔以金陵汴梁爲南北京○庚午達入大都元亡○巳卯大赦○帝幸北京○設六部官滕毅楊士義錢用壬陳寬周禎單安仁爲尚書○御史中丞劉基致仕○放元宮人○九月江西叅政陶安卒○遣儒臣詹同等訪求賢哲○冬十月帝還南京○征南師還 置京畿漕運司龔魯薛祥爲漕運使○十一月孔希學襲封衍聖公○遣儒臣魏觀等訪求賢材○十二月達克太原平陽

巳洪武二年春正月免山東山西北平河南南畿

田租○詔諭四夷君長○倭寇山東並海郡縣○
二月耕藉田○修元史宋濂爲翰林學士王禕待
制○修治皇陵○達克河中進取陝西○三月達
兵至鳳翔李思齊奔臨洮○夏四月思齊降○倭
寇南畿並海郡縣○五月甲午朔日食○達出蕭
關下涼涇延廊張良臣以慶陽降尋叛○御史中
丞兼太子贊善大夫章溢卒○六月常遇春克大
寧開平○秋七月征虜副將軍平章軍國重事太
子少保鄂國公常遇春卒李文忠領其兵進攻大
同克之○八月達克慶陽斬良臣陝西悉平○元

史成○九月以臨濠爲中都○建功臣廟○冬十
月郡縣立學○遣使貽書元主○十一月乙巳日
南至祀圜丘奉仁祖配○十二月王保保襲蘭鞏
守將于光死之○是年定內侍諸司官○設王相
府○封陳日煒爲安南國王王顓高麗國王
庚
洪武三年春正月征虜大將軍徐達左右副將
軍李文忠馮勝左右副副將軍鄧愈湯和分道率
師討王保保○二月大同守將金朝興取東勝○
追封郭子興滁陽王○文忠取興和○三月免南
畿山東河南北平浙東田租○達兵至定西保保

退屯車道峴○夏四月封建諸王○王保保逆戰
我兵敗績○復戰於定西保保敗走和林○元君
妥懽睦爾殂于應昌其子愛猷識理達臘嗣立○
五月開科取士○文忠克應昌獲買的里八剌愛
猷識理達臘北走○達取漢沔降興元○大旱上
雩大雨○蜀寇興元都督孫興祖戰歿○六月倭
寇登萊轉掠浙閩並海諸郡萊州府同知趙秩使
日本○定太學生資格○秋七月陶凱爲禮部尚
書○劉基爲弘文館學士○楊憲汪廣洋爲中書
左右丞尋殺憲○八月募民輸粟中鹽○監察御

史張敬之使諭渤泥國○九月改司天監爲欽天
監○冬十月征南將軍周德興討慈利蠻○貽書
元嗣君愛猷識理達臘○十一月文忠班師還京
○謚故元君爲順帝封買的里八剌爲崇禮侯○
大封開國功臣進封善長達韓魏國公領太師太
傅封李文忠曹國公鄧愈衛國公馮勝宋國公湯
和中山侯汪廣洋忠勤伯劉基誠意伯餘封贈官
賞有差○十二月大明志成○立鹽法

辛亥
洪武四年春正月太師韓國公左丞相李善長
致仕汪廣洋爲左丞相胡惟庸右丞○誠意伯劉

基致仕○征西將軍中山侯湯和左右副將軍江
夏侯周德興德慶侯廖永忠征虜前將軍潁川侯
傅友德左副將軍濟寧侯顧時帥師分道伐蜀○
免田租○二月帝如中都尋還京○三月賜吳伯
宗等進士及第出身有差○改築園丘方澤○閏
三月和次夔州○廢靖江王守謙爲庶人○夏四
月友德克階州○和次歸州友德克文州○徵山
林隱士○五月免浙江江西田租○六月友德拔
漢州永忠克夔州進至重慶明昇降○虜納哈出
侵遼東○倭寇膠州○秋七月馬雲葉旺爲定遼

指揮使鎮守遼東○友德克成都川蜀悉平○詹
同爲吏部尚書兼翰林院學士承旨○令奏災異
○八月封明昇歸義侯○九月庚戌朔日食○禁
征海外諸夷○冬十月征西諸將班師還京○十
一月○十二月開茶市○是年徙歸德侯陳理歸
義侯明昇於高麗○日本良德遣人入貢

壬子洪武五年春正月翰林待制王禕詔諭雲南○
征南將軍衛國公愈副將軍江夏侯德興江陰侯
良帥師討廣西蠻平之○征虜大將軍魏國公達
征西將軍宋國公勝征虜前將軍曹國公文忠帥

師分道伐虜勝取其肅文忠禱應昌宣寧侯曹良臣戰歿○二月都督藍玉擊敗虜於野馬川○三月玉兵擊敗王保保於土刺河○夏四月鄧愈兵至灃平散毛諸蠻○五月達兵逾嶺遇虜戰敗績○倭寇浙東西並海郡縣○六月賑山東饑民○勝兵敗虜於瓜沙文忠兵敗虜於阿魯渾河○免水旱蝗郡縣田租○秋七月湯和兵至斷頭山遇虜戰敗績○定宦官禁令○八月倭寇福建○遣儒臣詹同等訪求賢哲○革寧夏府○九月德興平鳳泗諸蠻○安南陳叔明弒其主日燧而自立○冬十月北征諸將班師還京○十一月征南諸將班師還京○虜納哈出寇遼東○十二月宋濂爲太子贊善大夫○令省府臺置銅鑪簿錄時政○縱內府禽獸○遣使貽書元嗣君○是年定掖庭局司女官

癸丑洪武六年春正月謫汪廣洋爲廣東叅政○二月罷科舉舉賢良○令有司上山川險易圖○三月征虜大將軍達左右副將軍文忠勝左右副副將軍愈和統兵分道備虜○都督於顯總兵出海防倭○夏四月贈謚開國功臣○詔求賢才○五

月虜寇武朔達遣兵擊走之○六月免河北旱蝗
田租○秋七月劉惟謙爲刑部尚書○胡惟庸爲
右丞相陳寧御史大夫詹同兼翰林學士承旨宋
濂兼翰林侍讀學士○達遣列侯諸將分統步騎
兵擒討殘胡○倭寇登萊○八月詔祀三皇○建
歷代帝王廟○九月設六科給事中○冬十月大
明律成○封西番朶甘烏思藏諸酋爲王師官長
○十一月達兵破虜於大同○閏十一月定糾劾
內官法○十二月浚開封漕河○雲南人殺我詔
諭使王禕

甲寅洪武七年春正月文忠敗虜於白登○二月丁
酉朔日食○丁未祀先師○三月詹同解部事呂
熙爲吏部尚書○轉漕粟于陝西○夏四月都督
藍玉敗虜於興和○五月大雩○六月倭寇膠海
○秋七月文忠破虜於大石崖○八月文忠敗虜
於豐州○靖海侯吳禎總兵出海捕倭○九月遣
崇禮侯買的里八剌北還○復設市舶司○冬十
月巳未皇長孫雄英生○徙江南民實中都○十
一月封卜煙帖木兒爲安定王○十二月鑿石灰
山河○日本良懷及其陪臣各遣人入貢却之

乙卯洪武八年春正月梁敏爲工部侍郎○二月○
三月詔興學勸農○立鈔法錢法○夏四月幸中
都尋還京○致仕贊善大夫護軍誠意伯劉基卒
○五月市馬西番○六月○秋七月己未朔日食
○免江南湖北旱租○八月京師大旱○開登萊
河○九月湖廣叅政吳雲使雲南○虜寇大同鴈
門○詔舉富民素行端潔達時務者○冬十月皇
太子及秦晉楚靖江王講武中都○十一月增六
部官○十二月陝州人獻天書斬之○虜納哈出
寇遼東守將馬雲葉旺擊敗之以爲都督僉事仍
書陶凱爲國子祭酒

守遼東○是年設都指揮使司○召致仕禮部尚

書陶凱爲國子祭酒

丙辰洪武九年春正月定宗王公主歲祿○二月和

友德屯延安○三月免南畿山西陝西河南福建

江西北平湖廣田租○夏四月庚戌雨○五月雨

○六月詔改行中書省爲承宣布政使司○宋濂

爲翰林學士承旨○秋七月癸丑朔日食○蘇松

嘉湖大水免其田租○八月吳印爲山東左布政

使○九月更定王府官制○閏九月七曜紊度詔

不直言○冬十月更作太廟○定太廟侑享功臣

○十一月吐蕃寇西塞○十二月賑江南湖北○
置寧夏諸衛

丁巳
洪武十年春正月學士承旨宋濂致仕○二月
白虹貫日○三月○夏四月征西將軍鄧愈副將
軍沐英率師討吐蕃破之○五月韓國公善長曹
國公文忠總中書省都督府御史臺同議軍國重
事○六月政事啓皇太子處分奏聞○秋七月監
察御史巡按州縣○設通政司曾秉正爲通政使
○八月庚戌改建園丘于南郊○九月江東浙西
大水免其田租○冬十月封沐英西平侯○併省

州縣○十一月己卯皇孫允炆生○丁亥合祀天
地于奉天殿○征西將軍叅軍國事衛國公鄧愈
卒○都督濮真征高麗被執不屈死之○十二月
乙巳朔日食○松番蠻入寇平羌將軍御史大夫
丁玉討平之○真人張正常卒子宇初嗣○是年
汪廣洋復爲右丞相○復守謙靖江王徙雲南尋
安置鳳陽

戊午
洪武十一年春正月改封吳王爲周王罷杭州
護衛○進封湯和信國公○二月祀太社太稷奉
仁祖配○三月禁奏事關白中書省○夏四月朱

大正言 卷之二 三六六
夢炎爲禮部尚書○元嗣君愛猷識理達臘殂子
脫古思帖木兒立○五月選武臣子讀書國子監
○六月遣使祭故元嗣君○秋七月○八月免南
畿河南陝西廣東湖廣田租○蘇松揚台海溢○
九月有星孛於天弁○贈劉繼祖義惠侯○冬十
月甲子大祀殿成○十一月吐蕃入寇征西將軍
英討平之○十二月乙巳朔日食○是年皇太子
妃常氏卒

未巳洪武十二年春正月巳卯合祀天地于南郊○
二月曹國公文忠督理隴西西寧軍務○信國公

和率列侯諸將練兵臨清○三月樂韶鳳爲國子
祭酒尋致仕○夏四月免北平田租○五月○閏
五月○六月都督馬雲征大寧○秋七月曹國公
文忠領大都督府事○平羌將軍丁玉討平蜀寇
○八月安置日本使僧於陝西○九月西平侯英
大破西番班師○冬十月吳沉爲翰林待制○十
一月封藍玉永昌侯○十二月安置右丞相汪廣
洋於海南暴卒○訪求卜筮人

庚申洪武十三年春正月殺左丞相胡惟庸御史大
夫陳寧中丞余節罷中書省更定六部官秩改大

大政記 卷之十一 三十八十一
都督府爲中左右前後五軍都督府○僂斯爲吏部尚書尋改禮部劉崧爲署吏部尚書○二月詔舉聰明正直孝弟力田賢良方正文學術數之士○太師韓國公李善長罷○三月壬寅成祖之國北平○桂彥良葛誠爲晉燕府長史○夏四月都督張赫朱壽率舟師海運○五月甲午震謹身殿大赦免天下田租○御史大夫安然罷韓國公李善長理御史臺事○罷御史臺及提刑按察司○署吏部尚書劉崧致仕阮峻爲吏部尚書○六月震奉天門○置諫院官唐鐸爲諫議大夫○秋七

月復京官家○八月安置日本使僧於川陝○九月置四輔官以龔敷杜敷趙民望吳源爲春夏官○冬十月詔求真才○十一月○十二月列侯諸將屯田北平練兵遼東○安置翰林學士承旨宋濂於茂州○是年倭屢寇海上郡縣

辛西
洪武十四年春正月虜乃兒不花入寇征虜大將軍達左右副將軍和友德帥師討之○詔求賢○編賦役黃冊○二月李叔正爲禮部尚書○三月大赦○復提刑按察司○夏四月達督諸將兵出塞至北黃河擊虜破之遂班師○五月故翰林

學士承旨宋濂卒於夔州○六月海鹽捍海塘成
○秋七月復大理寺○日本酋良懷遣僧貢馬安
置川陝番寺○八月河決原武○征南將軍江夏
侯周德興副將軍安慶侯仇成帥師討四川蠻平
之○九月征南將軍潁川侯友德左右副將軍永
昌侯玉西平侯英帥師取雲南○冬十月壬子朔
日食○定考覈殿最法○十一月南雄侯趙庸總
兵討平閩廣羣盜延安侯唐勝宗總兵討浙東山
寇平之○倭寇廣東南雄侯庸擊破之○十二月
征南兵至曲靖取臨安進克雲南○令翰林院平

駁諸司奏啓○是年召致仕刑吏部尚書李敬劉
崧爲國子祭酒司業

壬戌洪武十五年春正月汝南侯梅思祖掌雲南布
政司事張統爲左叅政○二月詔諭雲南諸夷○
閏二月彗星見○征南兵克大理鶴慶麗江降車
緬諸夷○三月南雄侯庸籍蛋戶爲水軍○夏四
月詔監學通祀孔子○免南畿浙江江西河南山
東田租○宋訥爲翰林學士○日本遣人朝貢○
五月皇長孫雄英卒○太學成帝幸學謁先師○
遣使求經明行修之士○六月○秋七月開濟爲

試刑部尚書○八月丙戌皇后馬氏崩○詔設科
取士○九月雲南諸夷叛征南兵討平之○冬十
月廣東盜起南雄侯庸討平之○設殿閣大學士
邵質吳伯宗宋訥吳沉爲華蓋武英殿文淵東閣
大學士○徵耆儒鮑恂余銓張長年爲文華殿大
學士辭不拜○十一月○十二月孝陵成封都督
李新崇山侯○是年設都察院詹徽林駟爲監察
都御史

癸亥 洪武十六年春正月宋訥爲國子祭酒曹國公
文忠領國子監事○二月○三月征南諸將班師

還京留英鎮守雲南○復鳳淮繇賦視豐沛○夏
四月倭寇浙東○五月令都司上衛所城池水陸
地理圖○六月○秋七月遣御史錄囚於諸省○
八月壬申朔日食○九月征南將軍申國公鄧鎮
左右副將軍臨江侯陳鏞濟寧侯顧敬率兵討龍
泉山寇平之○冬十月○十一月定祀歷代名臣
○十二月初令儒學歲貢生員

甲子 洪武十七年春正月魏國公達鎮守北平信國
公湯和巡視海道築山東江南北浙東西海上諸
城○二月更定都察院官詹徽爲左都御史○定

吏員資格○三月大赦○令科舉薦舉並行○同知軍國事大都督府左都督兼領國子監事曹國公李文忠卒○夏四月進封傅友德潁國公○更定內侍監局司庫門官品職○五月鄒俊爲大理卿○六月令朝覲官上人民土地圖○秋七月盱眙人獻天書伏誅○八月吏部尚書俞熾定考績法○九月處士陳遇卒○冬十月冊李氏爲淑妃攝中宮事○閏十月大明清類天文分野書成○十一月○十二月○是年修祖陵

乙丑洪武十八年春正月劉三吾爲翰林學士○朱

善爲文淵閣大學士○二月初昏五星並見求直言○錄軍國重事太傅右丞相魏國公徐達卒○三月初選進士爲翰林院承勅監六科庶吉士○夏四月思州苗叛征虜將軍和副將軍德興帥師從楚王討平之○五月○六月○秋七月五開蠻叛和遣兵討平之○八月遣公侯伯還鄉里○九月太白經天○文淵閣大學士朱善卒○築漳河隄○冬十月頒大誥○彗星見○十一月作觀星臺○十二月舉孝廉

丙寅洪武十九年春正月潁國公友德長興侯炳文

帥師討雲貴諸蠻平之○二月納哈出營金山數
寇東塞○三月白虹貫日○夏四月河南大水贖
民粥子○五月安置日本使僧於雲南○六月詔
有司養老尊賢報功賑貧恤孤薦士○秋七月三
辰星見○八月皇太子修祖陵○九月賑旱蝗郡
縣○冬十月封何真東莞伯○十一月○十二月
癸未朔日食

丁卯 洪武二十年春正月征虜大將軍宋國公馮勝
左右副將軍潁國公傅友德永昌侯藍玉左右叅
將南雄侯趙庸定遠侯王弼東川侯胡海武定侯

郭英叅贊軍事都督商高帥師討納哈出○焚錦
衣衛刑具○二月魚鱗冊成○置兩浙防倭衛所
○三月勝師出松亭關城大寧○夏四月江夏侯
周德興福建築城練兵防倭○五月納哈出棄金
山營北走○六月臨江侯陳鏞陷虜死○勝兵逾
金山納哈出降遂班師○太白經天○閏六月勝
兵還金山殿帥濮英陷虜死○秋七月定親王歲
祿五萬石○八月戒諭北征諸將召勝還玉行總
兵事○九月封納哈出海西侯○安置鄭國公常
茂於龍州○置北平行都指揮使司於大寧○征

虜大將軍永昌侯藍玉左右副將軍延安侯唐勝
宗武定侯郭英左右叅將都督耿忠孫恪擒討殘
胡○冬十月罷勝歸鳳陽○十一月靖寧侯葉昇
普定侯陳桓討東川諸蠻平之○十二月封張赫
航海侯朱壽舳艫侯

戊辰洪武二十一年春正月百夷思倫發叛都督甯
正討平之○二月定歷代君臣從祀帝王廟○三
月遣公侯諸將從大將軍玉出大寧征虜○夏四
月玉師至捕魚兒海脫古思帖木兒可汗敗走封
玉涼國公○五月甲戌朔日食○東川蠻叛征南

將軍穎國公友德左右副將軍西平侯英普定侯
桓帥師討平之○六月○秋七月贈故金山侯濮
英爲樂浪公尋封其子璵西涼侯○八月北征諸
將班師還京○九月越州土酋阿資叛友德討平
之○友德遣將分討東川叛蠻平之○冬十月解
縉爲監察御史○徐允恭嗣封魏國公封常昇開
國公○十一月○十二月丁卯三辰晝見○安南
黎季犛弒其主煒

已洪武二十二年春正月友德兵至越州阿資遁
還越州○二月友德兵至越州阿資降○三月友

德率二十四將軍分屯湖川防西南諸夷○夏四月徙江南民田淮泗○置詹事院○五月置大寧福餘朶顏三衛於兀良哈○六月周定王棄國之鳳陽遷雲南尋遣還國○秋七月征南諸將班師還京○八月更定大明律○禁武臣預民事○九月丙寅朔日食○冬十月徙民墾閒田○十一月虜也速迭兒弒其主脫古思帖木兒而立坤帖木兒○思倫發入貢謝罪百夷遂平○十二月倭掠寧海○是年詹徽爲吏部尚書兼左都御史○改大宗院爲宗人府秦王爲宗人令晉王成祖左右

宗正周王楚王左右宗人○黎季犛弒其主陳日焜○高麗人幽其主禍又廢其主昌

庚午洪武二十三年春正月熒惑入南斗○市馬漠

北○晉王成祖率諸將分道伐虜○貴州苗叛延安侯勝宗討平之○贛賊湖蠻叛總兵東川侯海左右副總兵普定侯桓靖寧侯昇討平之○二月國子祭酒宋訥卒○涼國公玉討西番遣將瞿能徐凱出大渡河擊敗之○三月成祖率征虜前將軍穎國公友德左右副將軍南雄侯庸懷遠侯興出古北口伐虜○夏四月築京城外垣○閏四月

玉平諸番○五月肅清奸黨○太師韓國公李善長暴卒○六月選用耆民有才德知典故者○秋七月江南北海溢○河決河南○八月召涼國公玉還京○九月庚寅朔日食○夏長文爲僉都御史○冬十月○十一月○十二月購遺書○是年潭王梓暴卒

辛未 洪武二十四年春正月築浙東海隄○二月改封豫王爲代王漢王爲肅王衛王爲遼王○三月戊子朔日食○賜許觀等進士及第出身有差○友德兵出東塞討虜大獲而還○夏四月鑄渾天

儀○彗星出紫微垣○五月漢衛谷慶寧岷六王練兵臨清○六月河決原武入淮○秋七月徙民實京師○八月乙丑皇太子巡撫陝西○九月都督宋晟劉貞帥師征哈密大獲而還○倭寇廣東○冬十月北平大水免其田租○馮堅爲僉都御史○十一月宋國公勝涼國公玉請討西番不許○十二月皇太子還獻相宅圖○阿資復叛平羗將軍都督何福討之阿資降

壬申 洪武二十五年春正月河決陽武○福討平雲南諸蠻○令死囚輸粟塞下○二月高麗李成桂

幽其主瑤而自立○列侯諸將練兵西北諸塞○
三月舳艫侯朱壽率舟師海運○夏四月丙子皇
太子卒○涼國公玉征罕東○都督總兵聶緯討
建昌叛酋月魯帖木兒○五月封俞通淵爲越雋
侯○玉兵破罕東移兵討建昌蠻○六月征西將
軍西平侯沐英卒○秋七月琉球中山王察度遣
子弟學於國子監○八月葬懿文皇太子○九月
庚寅立皇孫允炆爲皇太孫○冬十月沐春嗣西
平侯鎮守雲南○更高麗爲朝鮮國○十一月玉
平建昌蠻獲月魯帖木兒檻送京師伏誅○十二
月宋國公勝頴國公友德曹國公景隆涼國公玉
開國公昇全寧侯恪兼太子太師太傅太保詹徽
茹瑺太子少傅少保兼吏兵部尚書○閏十二月
翰林學士劉三吾罷

癸酉 洪武二十六年春正月兵部尚書致仕唐鐸刑

部尚書楊靖兼太子賓客○二月晉王統山西河
南兵出塞捕虜○曹國公景隆市馬西番○殺涼
國公藍玉吏部尚書詹徽○驗封主事翟善署吏
部事尋爲尚書○三月倭寇浙東○夏四月太白
經天京師大旱求直言錄囚徒○五月○六月郁

新茹瑯巖震直爲戶兵工部尚書○秋七月甲辰朔日食○八月徙慶靖王於韋州○九月復以劉三吾爲翰林學士○赦胡黨藍黨○冬十月徙封岷莊王於雲南○十一月劉璟爲谷府長史提督調燕代蕭遼慶寧六府事○十二月

甲戌洪武二十七年春正月賑貸貧民○二月倭寇浙東都督劉德商高巡視兩浙防倭○三月都督楊文魏國公徐輝祖安陸侯吳傑練兵浙江防倭○韓王瀋王分道省視秦晉燕周齊王○城東勝○夏四月令民樹桑棗○五月却安南朝貢○六

月○秋七月任亨泰爲禮部尚書○八月階文軍叛平羌將軍都督甯正討平之○九月寰宇通衢書成○冬十月倭寇金州○十一月阿資復叛西平侯春率兵討之阿資走○十二月女直寇遼東都督宋晟劉貞禦却之○是年太子太師潁國公傅友德暴卒

乙亥洪武二十八年春正月都督周興總兵宋晟劉貞副之帥師捕野人○西平侯沐春擒斬阿資越州平○二月太子太師宋國公馮勝卒○三月秦愍王卒世子尚炳嗣秦王○夏四月倭寇金州○

五月討平四川洞蠻○六月禁黥官剗之刑○
秋七月廣西守將韓觀討平山寇○八月征南將
軍楊文左右副將軍韓觀宋晟參議軍事兵部尚
書唐鐸帥師討龍州諸蠻○信國公湯和卒○貴
州蠻叛守將顧成討平之○九月貶翟善爲宣化
知縣○閏九月皇明祖訓成○更定親王歲祿一
萬石○罷揚雄文廟從祀祀董仲舒○冬十月冊
馬氏爲皇太孫妃○十一月諸蠻悉平○十二月
征南諸將班師還京○是年給事中傅安郭驥使
西域

丙子洪武二十九年春正月杜澤爲吏部尚書○門
克新爲禮部尚書○韓觀爲都督同知○二月征
虜前將軍胡冕討郴桂蠻平之○三月○夏四月
○五月○六月築河防○秋七月○八月免應天
五郡田租○九月○冬十月晦皇曾孫文奎生○
十一月鑄渾天儀○十二月五星紊度○是年定
外官三年一朝覲○罷大理寺

丁丑洪武三十年春正月征西將軍長興侯耿炳文
副將軍武定侯郭英備虜關中○漢沔盜起炳文
討平之○劉觀耿清爲署左右僉都御史○二月

白虹亘天○水西蠻叛征南將軍顧成討平之○
三月○夏四月晉王成祖練兵備虜○令軍民有
一材一藝者得自陳効用○五月壬子朔日食○
楚王湘王率都督楊文韓觀顧成兵征諸洞蠻平
之○晉燕代遼寧谷六王勒兵備虜○六月翰林
院學士劉三吾暴卒○賜禮部覆試貢士韓克忠
等進士出身有差○召駙馬郡尉歐陽倫暴卒○
秋七月左都御史楊清暴卒○八月河決開封○
鄭沂爲禮部尚書○九月平緬諸蠻刁幹孟叛逐
宣慰使思倫發○冬十月熒惑犯南斗○重建國

子監先師廟成○十一月征虜前將軍西平侯春
左右副將軍都督何福徐凱率師討刁幹孟○十
二月癸未上不豫○是年太子少保掌刑部事唐
鐸卒

戊寅 洪武三十一年春正月令山東河南墾田○二
月倭寇山東浙東○定吏員出身資格○三月廷
臣請討朝鮮不許○夏四月邊將分道率兵從成
祖代遼寧谷王出北平禦虜○黃福爲工部右侍
郎○五月西平侯春擒刁幹孟思倫發還平緬○
甲寅上不豫○都督楊文總兵北平叅贊成祖○

總兵武定侯英副總兵宋晟從遼王出開平備虜
○閏五月乙酉帝崩于西宮○辛卯皇太孫卽皇
帝位○葬孝陵號謚大行皇帝太祖高皇帝孝慈
皇后孝慈高皇后○蹇義夏原吉爲吏戶部右侍
郎○革冗員○省府州縣○六月方孝孺爲翰林
侍講齊泰兵部尚書○秋七月董倫爲禮部左侍
郎兼翰林學士○廢周定王爲庶人○吏部尚書
茹瑺掌河南布政司事尋召爲兵部尚書○八月
魏國公輝祖兼太子太傅○征夷將軍都督何福
副將軍徐凱帥師征百夷平之○九月長星西隕

○雲南總兵西平侯沐春卒○冬十月熒惑守心
○吏部尚書茹瑺免張統爲吏部尚書○十一月
御史解縉謫吏河州○工部侍郎張昺掌北平布
政司事謝貴張信北平都指揮使○陳廸爲禮部
尚書○舉山林巖穴懷材抱德之士○齊王搏有
罪留京邸○十二月征南總兵顧成班師還京○
是年王鈿爲戶部尚書鄭賜工部尚書曾鳳韶監
察御史

巳建文皇帝建文元年春正月大祀天地於南郊
奉太祖高皇帝配○修太祖高皇帝實錄○二月

追尊皇考懿文皇太子爲興宗孝康皇帝皇妣懿
敬皇太子妃爲孝康皇后○尊母皇太子妃呂氏
爲皇太后○立妃馬氏爲皇后子文奎爲皇太子
○封弟允燿爲吳王允燾衡王允燮徐王○詔薦
賢養老墾田興學考察官吏旌孝賑貧掩骼埋胔
贖民鬻子減田租○令親王不得節制文武吏士
○周是修爲衡府紀善○北平右布政使曹昱按
察副使張璉有罪除名落職○三月丁巳祀先師
幸太學○北平按察使陳瑛有罪安置廣西○勅
都督宋忠徐凱耿璈將兵屯開平臨清山海關○

遣采訪使都御史暴昭侍郎夏原吉等巡行天下
問民疾苦○京師地震求直言貶監察御史尹昌
隆爲福寧知縣○夏四月并衛所○湘王柏暴卒
○廢齊王榑代王桂爲庶人○五月北平按察僉
事湯宗上變告繫詔獄○王叔英爲翰林修撰○
六月解縉爲翰林待詔○秋七月癸酉成祖起兵
靖難北平右布政使郭資都指揮張信降掌布政
司事侍郎張昺都指揮使謝貴燕府長史葛誠伴
讀余逢辰死之宋忠率師次居庸退保懷來○成
祖上書請誅齊太黃子澄○都指揮使馬宣起兵

薊州攻北平不克死之○通薊遵化密雲皆降燕
○成祖克懷來獲宋忠都指揮彭聚孫泰戰死○
大寧守將劉貞陳亨卜萬引兵次松亭關逮萬下
獄○征虜大將軍長興侯耿炳文左右副將軍駙
馬都尉李堅都督甯忠率安陸侯吳傑江陰侯吳
高都督都指揮盛庸潘松楊忠顧成徐凱李文陳
暉平安分道進攻北平○置平燕布政使司于真
定刑部尚書暴昭掌布政司事○贈故翰林待制
王禕爲翰林學士○封李堅爲灤城侯○八月炳
文兵次真定○靖難兵克雄縣獲楊忠潘松○炳

文及靖難兵戰於真定敗績李堅甯忠被執○丙
寅成祖還北平○曹國公李景隆爲征虜大將軍
召炳文還○谷王穗還京師○召遼王植寧王權
遼王至寧王不至徙封遼王於荊州○九月吳高
及耿璫楊文帥兵圍永平○景隆兵次河間○山
東叅政鐵鉉叅贊景隆軍務○成祖援永平高退
保山海關○吳傑兵潰於真定遁還降南寧指揮
使○冬十月成祖襲破大寧守將朱鑑死之○陳
亨降燕襲破劉貞貞走還京○景隆進兵攻北平
○成祖以寧王權及大寧漢達兵援北平○十一

月景隆逆戰於鄭村壩大敗奔德州○乙亥成祖再上書○廢岷王梗爲庶人○十二月吳高有罪徙廣西楊文鎮守遼東○成祖克廣昌○薊州鎮撫曾濟起兵攻北平不克死之駙馬都尉王寧有罪下獄○練子寧爲吏部侍郎○復以茹瑺爲兵部尚書○罷齊太黃子澄留京師○加景隆太子太師○省躬殿成○徙肅莊王於蘭縣○殺留守左衛指揮同知李申○叅贊大將軍軍務高巍使北平錢芹爲行軍署都事茅大芳爲副都御史○庚辰建文二年春正月成祖克蔚州進攻大同○二

月改都察院爲御史府改景清爲御史大夫戴德彛左拾遺○黃觀爲禮部侍中掌尚寶司事○虜坤帖木兒可汗瓦剌王猛哥帖木兒款北平○景隆援大同○成祖還北平○保定知府雒僉降燕○劉儁爲兵部侍中○三月丙寅朔日食○賜胡靖王艮等進士及第出身有差○夏四月胡靖爲翰林修撰○成祖至白溝河景隆率諸將兵合戰大敗走德州叅政鐵鉉叅軍高巍還守濟南○靖難兵進攻德州○五月景隆奔濟南靖難兵入德州轉掠濟陽儒學教諭王省死之○成祖進兵圍

濟南景隆出戰敗績鐵鉉高巍禦却之○都督僉事朱榮棄師還京伏誅○六月置資德院○遣尚寶司丞李得成至燕議罷兵○秋七月得成還自濟南下獄尋釋之○平安率兵次單家橋○八月濟南圍解成祖還北平○承天門災詔求直言○改謹身殿爲正心殿○改方孝孺爲文學博士○九月改承天門爲臯門○冬十月置威武中衛○平安及靖難兵戰鏢山斬其將陳亨○徐凱城滄州成祖襲破之獲凱○封盛庸爲歷城侯鐵鉉爲山東左布政使○召景隆還平燕將軍盛庸左右

副總兵陳暉平安左右叅將馬溥徐真鐵鉉叅贊軍務督諸兵北進○十一月庸進兵德州○成祖至臨清移屯館陶○十二月成祖進兵汶上掠濟寧庸兵躡之營於東昌○乙卯成祖至東昌○庸出兵大戰斬其將張玉成祖退屯館陶○鐵鉉爲兵部尚書仍叅贊軍務○詔舉優通文學之士○鄒瑾爲大理右寺丞

辛巳建文三年春正月凝命神寶成○召齊太黃子澄議軍國事○成祖還北平○二月成祖至保定○加禮部尚書陳迪太子少保○調大理左右少

卿汪善聞良輔爲河南湖廣肅政按察副使鎮江
知府薛嵩補缺胡閏爲大理左右少卿○三月成
祖合諸兵南進○庸及靖難兵大戰於夾河斬其
將譚淵再戰庸兵敗走德州○真定諸將及靖難
兵戰於單家橋敗績再戰於藁城敗績○閏三月
靖難兵掠順德廣平大名○謫齊太黃子澄諭燕
罷兵○成祖上書請召諸將還京遣大理少卿薛
嵩報之○夏四月嵩還○真定諸將出兵扼燕餉
道不克○五月成祖遣武勝上書下詔獄○調刑
部左侍郎王良爲浙江肅政按察使○六月靖難

兵至濟沛都督袁宇禦之敗績○太僕少卿祝孟
獻使朝鮮市馬○秋七月靖難兵掠彰德○遣人
貽書燕世子○大同守將房昭率兵取保定駐西
水寨成祖還援保定○八月靖難兵圍西水寨○
限僧道田人五畝○九月靖難兵攻定州○平安
進攻北平不克還次真定○倭寇浙東○置豐沛
軍民指揮司○冬十月真定諸將遣兵援昭及靖
難兵戰於齊眉山敗績○成祖還北平○翰林修
撰王良卒○徙慶靖王於寧夏○十一月遼東總
兵楊文攻永平不克○平安戰敗靖難兵於楊村

○皇子文堯生○坤帖木兒可汗死鬼力赤爲可汗○十二月成祖復出北平○駙馬都尉梅殷鎮守淮安○太祖高皇帝實錄成○楊士奇爲吳府審理副仍留翰林○改程本立爲江西肅政按察副使

壬午建文四年春正月平安復通州不克○靖難兵攻東平吏日鄭華死之○靖難兵攻沛知縣顏伯瑋主簿唐子清典史黃謙死之○祭酒張顯宗爲工部右侍郎募兵江西○設京衛武學○二月諸將兵次濟寧○靖難兵攻徐州○三月靖難兵攻

宿州○成祖至渦河○安及靖難兵戰於淝河敗績○靖難兵攻蕭知縣鄭恕死之○夏四月安及靖難兵戰於小河斬其將王真○魏國公徐輝祖率兵會諸將及靖難兵戰於齊眉山敗之召輝祖還○靖難諸將請還北平○諸將合兵及靖難兵大戰於靈璧敗績何福走陳暉平安馬溥徐真禮部侍郎陳性善大理寺丞彭與明皆被執○五月成祖至泗州○盛庸次淮南○成祖渡淮至盱眙庸走○諸將分屯鳳陽淮安○成祖至揚州守將崇剛監察御史王彬死之○成祖至儀真○詔天

下勤王○遣刑部侍郎金純禮部侍郎黃觀翰林
修撰王叔英徵兵入援○蘇州知府姚善寧波知
府王璉率師勤王○遼東兵潰於直沽○刑部尚
書侯泰轉餉淮安○六月癸丑朔成祖至浦口庸
等逆戰都督僉事陳瑄率舟師降燕○乙卯成祖
渡江庸率海艘出高資港戰敗績○庚申成祖至
龍潭遣李景隆茹瑺王佐議割地罷兵○諸王分
守京城諸門○魏國公徐輝祖開國公常昇分道
出師禦戰○甲子遣人齎蠟書四出促勤王兵○
乙丑成祖至金川門谷王穗降成祖遂入京城○

殺都督徐增壽○大內火○帝遜位○己巳成祖
謁孝陵遂卽皇帝位○贈徐增壽爲武陽侯禁錮
魏國公徐輝祖○壬申葬建文皇帝○遷興宗孝
康皇帝主於陵仍稱懿文皇太子遷呂太后於懿
文陵○秋七月壬午朔大祀天地於南郊○大赦
○降封允熲允燧允熾爲廣澤懷恩敷惠王○都
督李增枝節制荆襄瞿塘安陸兵備○陳瑛爲副
都御史○工部尚書嚴震直等巡視河北諸省○
八月歷城侯盛庸安戢山東都督劉貞鎮守遼東
征虜前將軍都督何福鎮守陝西都督韓觀練兵

江西西平侯沐晟鎮守雲南○張統暴卒王鈍致仕蹇義夏原吉爲吏戶部尚書宋禮禮部右侍郎○初建內閣翰林待詔解縉爲侍講中書舍人黃淮編修並直文淵閣○九月大封靖難功臣○詔諭四夷君長○徙封谷王穗於長沙○廢廣澤王懷恩王爲庶人○黃福爲工部尚書○胡廣爲侍講楊榮修撰楊士奇編修金幼孜胡儼檢討並直文淵閣○冬十月寧王權來朝改封南昌○重修太祖高皇帝實錄○僧道衍爲左善世○十一月新作奉天殿成○解縉爲侍讀學士胡靖黃淮朝

儼並侍讀楊榮楊士奇金幼孜並侍講○立妃徐氏爲皇后○北平左布政使郭資保定知府雒僉爲戶刑部尚書仍掌司府事○陳瑛請追戮建文諸臣不許○十二月李至剛爲禮部尚書○戒諭靖難功臣

皇明大政記第一卷 子履準校孫心材重校

皇明大政記第二卷

吾學編第二

臣海鹽鄭曉

未癸成祖文皇帝永樂元年春正月陳瑛為左都御
 史○復封周齊代岷王○以北平為北京○二月
 設北京行部行後軍都督府郭資雜僉為行部尚
 書平安行都督僉事○貽書鬼力赤可汗○皇子
 高煦率兵備開平○武定侯郭英卒○三月徙北
 平行都司於保定以大寧界兀良哈○夏四月戶
 部尚書夏原吉治水江南○襄城伯李濬鎮守江
 西○太白出昴北○禁金錢交易○五月號謚皇

考妣太祖聖神文武欽明啓運俊德成功統天大
孝高皇帝孝慈昭憲至仁文德承天順聖高皇后
○六月太祖高皇帝實錄成○秋七月書諭鬼力
赤可汗○八月平江伯陳瑄總督海運○九月求
賢才○歷城侯盛庸暴卒○冬十月靖安侯王忠
安集北平○長興侯耿炳文暴卒○金忠爲兵部
尚書○十一月定武職新舊官襲替法○閏十一
月封黎蒼爲安南國王李芳遠爲朝鮮國王○十
二月徙富民實北京

甲申永樂二年春正月召世子及高煦還京○二月

貽書鬼力赤可汗○三月改封敷惠王允熾爲甌
寧王奉懿文皇太子祀○通政趙居任使日本令
十年一貢○夏四月簡東宮官蹇義兼詹事解縉
翰林學士兼右春坊大學士黃淮胡廣左右庶子
胡儼楊榮左右諭德楊士奇左中允○立世子高
某爲皇太子封皇子高煦漢王高燧趙王○倭寇
浙東○五月○六月封哈密安克帖木兒爲忠順
王○太子少師姚廣孝賑濟蘇湖○秋七月○八
月老撾送安南故王孫陳天平來朝○九月胡儼
爲國子祭酒○冬十月○十一月錄囚奉天殿○

設天津衛○鬼力赤馬哈木相讐殺遣人貢馬○
十二月禁錮李景隆○是年周新爲監察御史○
乙酉永樂三年春正月免順天永平保定田租二年
○二月改黃福爲北平行部尚書宋禮工部尚書
○三月安克帖木兒卒脫脫嗣封忠順王○保定
侯孟善市馬開原○夏四月僉都御史俞士吉使
日本封其酋爲日本國王○五月戒飭親王○六
月黎蒼表請陳天平歸國○賑江東饑民○秋七
月段民爲戶部右侍郎○八月戶部尚書郁新卒
夏原吉還掌部事○九月李至剛落職改鄭賜爲

禮部尚書呂震爲刑部尚書○冬十月駙馬都尉
梅殷暴卒○十一月○十二月左右副將軍黃中
呂毅帥師送天平歸國

丙戌永樂四年春正月考察北京及天下文武官○
南陽盜起豐城侯李彬新城侯張輔討平之○封
黎蒼爲順化郡公○二月趙王高燧居守北京○
三月謁先師視太學○書諭鬼力赤可汗○黎蒼
弒其故主天平於芹站○夏四月求遺書○五月
廢齊王榑爲庶人尋安置廬州○六月己未朔日
食○秋七月征夷大將軍成國公朱能左右副將

軍西平侯沐晟新城侯張輔叅贊軍務兵部尚書
劉儁督理軍餉行部尚書黃福大理卿陳洽率師
分道討黎蒼○朱濬爲行部尚書○閏七月建北
京宮殿○平江伯陳瑄兼江淮河衛轉運○八月
勅秦晉守將宋晟何福吳高練兵防胡○九月設
陝西甘肅苑馬寺○冬十月輔兵度坡壘關晟兵
至白鶴江○征夷大將軍總兵官成國公朱能卒
於龍川輔爲征夷大將軍○陳瑄擊倭於沙門島
敗之○十一月○十二月大赦○甌寧王允爌暴
卒○輔至交州晟追賊至木九江

丁亥永樂五年春正月輔晟合兵破賊籌江柵○二
月解縉爲廣西右叅議○三月輔晟合兵破賊於
富良江○夏四月皇長孫出閣就學○五月輔兵
追賊出奇羅海口擒黎蒼及其父季犛檻送京師
○六月安南平置交趾都布按三司都督呂毅掌
都司事尚書黃福兼掌布按司事○徵用交趾人
材○秋七月甘肅總兵官西寧侯宋晟卒○乙卯
皇后徐氏崩○八月議設海運都漕運使司○九
月季犛蒼及其僞將相下獄○冬十月辛巳朔日
食○初設屯田按察僉事○十一月胡廣爲翰林

學士兼左春坊大學士黃淮右春坊大學士楊榮
右庶子楊士奇金幼孜左右諭德兼職如故○令
內閣儒臣考滿吏部勿改外任○十二月戶科都
給事中胡濙訪求異人○是年撒馬兒罕同哈里
遣人送給事中傅安郭驥還

戊子永樂六年春正月○二月定巡狩禮○三月書
諭本雅失里○夏四月己卯朔日食○五月○六
月征夷諸將班師還京進封沐晟黔國公張輔英
國公封柳升安遠伯○禮部尚書鄭賜卒改呂震
禮部尚書都御史劉觀爲刑部尚書○楊榮憂去

○秋七月征西將軍寧陽侯陳懋鎮守寧夏○翰
林學士王景彰卒○八月交趾簡定反征夷將軍
沐晟叅贊軍務兵部尚書劉儁帥師討之○詔明
年二月巡北京○九月○冬十月乙亥朔日食○
十一月浡泥國王麻那惹加那乃來朝卒○勅文
武大臣輔導皇長孫○十二月晟兵遇賊於生厥
江敗績都督呂毅尚書劉儁交趾叅政劉昱死之
○英國公張輔總兵清遠侯王友副之帥師討簡
定○瓦剌攻破鬼力赤阿魯台立本雅失里爲可
汗

大正記 卷之二
丑永樂七年春正月太監鄭和航海通西南夷○
楊榮起復○二月帝發京師皇太子監國○茹瑺
下錦衣獄卒○平安暴卒○三月帝至北京○夏
四月遣給事中郭驥諭本雅失里驥不屈死之○
閏四月方賓爲兵部尚書○五月作壽陵於昌平
○簡定稱上皇立陳季擴爲越皇帝○封瓦剌兀
哈木爲順寧王太平賢義王把禿孛羅安祿王○
六月遣御史考察守令○秋七月征虜大將軍淇
國公丘福左右副將軍武城侯王聰同安侯火真
左右叅將靖安侯王忠安平侯李遠率師征本雅

失里○楊榮經畫甘肅軍務○八月征虜兵至於
臚胸河五將皆敗歿○輔敗賊於鹹子關○九月
輔敗賊於太平海口○甘肅總兵都督何福撫定
亦集乃諸酋封福爲寧遠侯○冬十月封陳懋爲
寧陽侯○十一月輔兵至美良獲簡定檻送京師
季擴走○十二月

庚寅永樂八年春正月召輔還晟節制諸軍雲陽伯
陳旭副之討季擴○簡定伏誅○二月帝帥師征
本雅失里皇長孫留北京夏原吉兼理行在部院
事○胡儼兼侍講掌翰林院事○三月大閱於鳴

鑾戍○永昌韃官叛總兵都督費瓛叅贊軍務刑部尚書劉觀討平之○夏四月○五月帝追虜至斡難河擊敗之本雅失里遁遂班師○六月阿魯台詐降逆戰敗走帝追擊大敗之○秋七月帝至北京○八月寧遠侯何福暴卒○長沙妖賊反豐城侯李彬討平之○九月周王請祀太祖於國中不許○冬十月帝發北京○贖民鬻子○十一月帝還京○十二月季擴請降以爲交趾右布政使尋復反

辛卯永樂九年春正月征虜副將軍輔及征夷將軍

晟會兵討交趾○二月赦交趾○尚書宋禮都督周長浚會通河○設奴兒干都司置開原馬市○三月陳瑛有罪下獄死○浚中灤河○夏四月○五月倭寇浙東○六月楊榮起復○逮交趾叅議解縉下錦衣獄○鄭和襲執錫蘭山國王亞烈苦柰兒○周宗範謝垣伏誅○秋七月輔晟兵敗賊於月常江○八月○九月○冬十月重修太祖高皇帝實錄○哈密忠順王脫脫卒封免力帖木兒爲忠義王尋卒封孛羅帖木兒爲忠順王○十一月立皇長孫瞻基爲皇太孫○輔率舟師破賊於

海上○十二月○閏十二月令百官條上軍民利病○令薦舉堪任牧民風憲者○阿魯台納款請併屬女直吐番諸部不許○是年滿刺加國王拜里迷蘇刺來朝

壬辰永樂十年春正月禁差守令○倭寇浙東○二月勅戒武臣○三月選庶吉士法司理刑○夏四月○五月○六月○秋七月赦亞烈苦柰兒歸國○八月輔兵破賊於神授海口○九月瓦剌馬哈木攻破本雅失里立答里巴爲可汗○冬十月皇太孫演武方山○輔兵破賊西心江○十一月楊

榮經畧甘肅軍務老的罕來降○十二月○是年殺浙江按察使周新○降安定王尚炆爲庶人安置泗州

癸巳永樂十一年春正月辛巳朔日食免朝賀○二月帝巡狩北京皇太孫從行皇太子監國○三月田琛田宗鼎伏誅設貴州布政司工部侍郎蔣廷瓚爲左布政使○夏四月○五月○六月○秋七月封阿魯台爲和寧王○八月吏部員外郎陳誠使西域○九月○冬十月○十一月瓦剌三酋叛○十二月輔晟會兵敗賊于愛子江擒季擴檻送

京師

甲永樂十二年春正月丙子朔日食免朝賀○二月安遠侯柳升將中軍寧陽侯陳懋襄城伯李隆豐城侯李彬遂安伯陳瑛武義伯王通保定侯梁瑛都督譚清新寧侯譚忠領左右哨掖討瓦剌○三月帝發北京皇太孫從行○夏四月五軍出塞○五月閱武楊林戍○六月丙寅朔日食○前鋒都督劉江破虜於康哈里○帝至土刺河答里巴及其三酋逆戰大敗之遂班師阿魯台遣人來朝○秋七月帝駐宣府○八月帝還北京○陳季擴

伏誅○九月令支運轉漕○閏九月逮黃淮楊士奇楊溥下錦衣獄尋釋士奇○冬十月吳高有罪免爲庶人○十一月甲午朔日食○命廣榮幼孜纂修五經四書性理大全○十二月

乙未永樂十三年春正月解縉暴卒○二月○三月禮官請賀大巖山呼萬歲不許○夏四月征夷將軍英國公張輔鎮守交趾○兵部尚書兼詹事金忠卒○五月陳瑄開清江浦罷海運令轉運○六月○秋七月誅貪殘守令○八月○九月壽陵成進封武義伯王通爲成山侯○五經四書性理大

全書成○冬十月吏部員外郎陳誠上使西域記
○十一月麻祿國進麒麟帝不受賀○十二月定
牧馬法

丙永樂十四年春正月○二月○三月改封趙王
於彰德漢王於青州○夏四月紀綱伏誅○祠祭
郎中周訥請封禪泰山不許○胡廣爲文淵閣大
學士楊榮金幼孜翰林學士○五月壬辰朔日食
○六月襄城伯李隆守備南京○秋七月遣將練
兵海上防倭○八月作北京西宮○九月初令御
史巡鹽○冬十月帝還南京○十一月復議建北

京○召張輔還京豐城侯李彬鎮守交趾○十二
月故吳王允通卒○胡濙爲禮部右侍郎○是年
監察御史黃宗載巡按交趾

丁酉永樂十五年春正月倭寇浙東○二月廢谷王
穗爲庶人○楊士奇爲翰林學士○三月漢王高
煦改封之國樂安○帝巡北京皇太子監國○夏
四月丁巳朔日食○五月倭寇浙東○山東旱蝗
○閏五月遣文武大臣分道經理漕運○六月建
北京郊廟宮殿○秋七月冊皇太孫妃胡氏○馬
哈木死封其子脫歡爲順寧王○八月○九月蘇

祿國王巴都葛叭答刺來朝卒○冬十月癸未朔
日食○禮部員外郎呂淵使日本○十一月趙犴
爲兵部尚書巡督塞上屯戍○十二月○是年安
惠王卒無子國除

戊永樂十六年春正月安南黎利反總兵李彬遣
兵討之利敗走○禮官請賀玄兔不許○二月○
三月太子少師姚廣孝卒○初令民運○夏四月
○五月太祖高皇帝實錄成○大學士胡廣卒○
六月纂修天下郡縣志○秋七月日本酋源義遣
使朝貢謝罪○八月○九月○冬十月○十一月

亦力把力歪惠弒其主納里失只罕而自立○十
二月申嚴賊禁

巳永樂十七年春正月○二月○三月蹇義起復
○夏四月○五月○六月遼東總兵都督劉江大
破倭奴於望海埭封江爲廣寧伯○秋七月○八
月○九月○冬十月○十一月○十二月令慎選
守令

庚永樂十八年春正月楊榮金幼孜並爲文淵閣
大學士兼翰林學士○閏正月○二月山東妖婦
唐賽兒反安遠侯柳升率兵討之○三月山東都

指揮衛青擊破妖賊唐賽兒遁逮升下詔獄尋宥之○夏四月廣寧伯劉江卒○五月交趾叅政侯保馮貴禦賊死之○大索唐賽兒○六月○秋七月○八月丁巳朔日食○九月己巳北京宮殿成蔡信爲工部右侍郎○冬十月○十一月改京師爲南京稱行在所爲京師○十二月皇太子太孫至京師○封薛祿爲陽武侯

辛永樂十九年春正月甲子朔帝御奉天殿受朝賀戊寅大赦○改楊士奇爲左春坊大學士○二月虜寇寧夏○三月○夏四月庚子奉天華蓋謹

身三殿災肆赦禁謗訕遣尚書蹇義等巡行天下安撫軍民監察御史何忠爲政平知州○五月李彬屯田交趾○六月○秋七月段民爲山東左叅政○八月辛巳朔日食○九月○冬十月阿魯台叛數寇邊○赦黎利爲清化知府○十一月議北征逮戶部尚書夏原吉工部尚書吳中繫掖庭獄兵部尚書方賓暴卒○十二月李慶爲兵部尚書壬永樂二十年春正月己未朔日食○二月議北征餽餉○三月阿魯台攻興和殺守將丁丑帝發京師討之○夏四月倭寇浙東○五月駐獨石大

閱○六月虜攻萬全○秋七月阿魯台北走旋師
討兀良哈大破之○工部尚書宋禮卒○八月班
師○九月帝還京逮大學士楊士奇尚書蹇義呂
震下錦衣獄尋釋之○冬十月○十一月○十二
月○閏十二月阿魯台弒其主本雅失理自稱可
汗

癸卯永樂二十一年春正月○二月○三月○夏四
月瓦剌脫歡攻阿魯台敗之○五月常山護衛指
揮王瑜告變孟賢伏誅○六月庚戌朔日食○秋
七月安遠侯柳升遂安伯陳瑛將中軍武安侯鄭

亨成國公朱勇英國公張輔成山侯王通將左右
軍寧陽侯陳懋將前鋒從征阿魯台○八月大閱
遂發京師○九月○冬十月虜酋也先土干降封
爲忠勇王遂班師○十一月帝還京○十二月○
是年李時勉復爲翰林侍讀

甲辰永樂二十二年春正月逮朝覲官下錦衣獄尋
釋之○阿魯台寇大同○二月○三月大閱安遠
侯柳升將中軍英國公張輔成山侯王通武安侯
鄭亨陽武侯薛祿將左右軍寧陽侯陳懋忠勇王
金忠將前鋒從征阿魯台○夏四月帝發京師○

五月閩浙盜起尋撫定之○六月帝出塞不見虜
遂班師○秋七月辛卯帝崩於榆木川○八月丁
巳皇太子卽皇帝位○大赦○出夏原吉吳中於
獄復其官○復設三公三孤○加蹇義少保楊榮
太常卿金幼孜戶部右侍郎楊士奇禮部左侍郎
兼華蓋殿大學士○出黃淮楊溥於獄淮爲通政
使兼武英殿大學士溥翰林學士○罷通西南海
夷○九月謚號大行皇帝太宗體天弘道高明廣
運聖武神功純仁至孝文皇帝仁孝皇后仁孝慈
懿誠明莊獻配天齊聖文皇后○尚書黃福還京

兵部尚書陳洽兼掌交趾布按司事○加蹇義少
傅楊士奇少保楊榮太子少傅兼謹身殿大學士
金幼孜太子少保兼武英殿大學士○襄城伯李
隆總兵鎮守山海尋復守備南京○冬十月向瑤
爲右都御史兼詹事○令三法司會內閣府部司
科於承天門審錄重囚○選東宮官安遠侯柳升
太子少傅成山侯王通陽武侯薛祿並太子太保
禮戶兵部尚書呂震夏原吉李慶太子少師少傅
少保戶部尚書郭資兼太子賓客刑部尚書吳中
工部尚書黃福並兼詹事會祭王英左右春坊大

學士黃宗載詹事府丞○立妃張氏爲皇后○立
皇太孫瞻某爲皇太子○嚴舉主連坐法○封都
督李賢爲忠勤伯○十一月宥建文諸臣家族○
交趾黎利反○改楊時習爲交趾按察使○遣御
史分巡察官吏○進蹇義楊士奇夏原吉少師
少傅少保左都御史劉觀太子少保改吳中工部
尚書兼太子少保金純刑部尚書○郭資進太子
太師致仕○虜寇雲州陽武侯薛祿擊敗之○葬
長陵○封張昶爲彭城伯○征西前將軍武安侯
鄭亨鎮守大同○十二月加楊榮工部尚書○作

觀天臺於禁中○徙封韓恭王於平涼○是年師
遼爲南京戶部尚書兼掌吏部事

皇明大政記第二卷

子履準校

孫心材重校

皇明大政記第三卷

吾學編第三

臣海鹽鄭曉

乙巳仁宗昭皇帝洪熙元年春正月加楊士奇兵部尚書黃淮少保戶部尚書金幼孜禮部尚書○楊溥直弘文閣○大祀天地於南郊奉太祖成祖配○大赦○布政使周幹按察使胡槩叅政葉春巡視江東浙西八郡○二月祭酒兼侍講胡儼加太子賓客致仕○除誹謗之禁○楊溥爲太常卿兼翰林學士○復北京行部行後軍都督府○胡濙爲太子賓客兼南京國子祭酒○三月權謹爲文

華殿大學士○征夷副將軍榮昌伯陳智率師討
黎利○吳訥爲監察御史○徙岷王榷於武岡○
夏四月南京屢地震○皇太子謁皇陵祖陵孝陵
○蠲水旱蝗田租○定太廟侑享功臣○五月修
成祖文皇帝實錄○改李時勉羅汝敬爲監察御
史○庚辰帝不豫召皇太子辛巳帝崩於欽安殿
○六月辛丑皇太子還至良鄉宮中始發喪○庚
戌皇太子卽皇帝位大赦○南京地震○秋七月
尊皇后張氏爲皇太后○號謚大行皇帝仁宗敬
天體道純誠至德弘文欽武章聖達孝昭皇帝○

立妃胡氏爲皇后○行在兵部侍郎戴綸副陳洽
贊理軍務○閏七月修仁宗昭皇帝實錄○胡濙
爲禮部左侍郎兼太子賓客○八月胡槩爲大理
卿及四川叅政葉春巡撫江南浙江○九月葬獻
陵○令會試分南北取士○冬十月丙寅朔日食
○十一月鎮朔大將軍陽武侯薛祿巡開平宣大
○平江伯陳瑄鎮守淮安兼都督漕運○十二月
南京地屢震○瓦剌馬哈木立脫脫不花爲可汗

皇明大政記第三卷 子履準校孫心材重校

皇明大政記第四卷

吾學編第四

臣海鹽鄭曉

丙午宣宗章皇帝宣德元年春正月金幼孜憂去尋

起復○二月○三月陳智方政兵討黎利敗績於

茶籠○張瑛爲禮部左侍郎兼華蓋殿大學士入

直文淵閣○夏四月呂震卒胡濙爲行在禮部尚

書○征夷將軍成山侯王通帥師征交趾尚書陳

洽仍叅贊軍務安平伯李安掌交趾都司事削陳

智方政官爵○五月召薛祿還京○沈度爲行在

翰林學士○六月○秋七月北京地震○八月壬

戊漢王高煦反辛未帝發北京襄王鄭王居守陽
武侯薛祿清平伯吳成將前鋒及五軍列侯諸將
從討之辛巳帝至樂安壬午擒高煦乙酉班師○
九月帝還北京○遣駙馬廣平侯袁容左都御史
劉觀諭趙王高燧○繫高煦於逍遙城王斌朱恒
伏誅○冬十月復以李時勉爲行在翰林侍讀○
十一月通擊交趾賊敗績尚書陳洽死之○十二
月征虜副將軍安遠侯柳升左副總兵保定伯梁
銘征南將軍黔國公沐晟左右副總兵興安伯徐
亨新寧伯譚忠率師分道討黎利兵部尚書李慶

叅贊軍務工部尚書兼詹事黃福仍掌交趾布按
司事○張本爲兵部尚書○是年以太和山佃戶
陳祚爲監察御史○于謙爲監察御史

丁宣德二年春正月○二月趙王高燧上書謝罪
○行在戶部左侍郎陳山爲尚書兼謹身殿大學
士直文淵閣○進張瑛禮部尚書○黎利攻交趾
城王通擊敗之○南京地屢震○王驥爲兵部侍
郎○三月改轉運爲支運○大理卿虞謙卒○夏
四月廢晉王濟熿爲庶人安置鳳陽○通許利和
貢方物請立陳氏後○五月鎮朔大將軍陽武侯

薛祿護餉開平○簡用罷黜庶官○六月寧陽侯
陳懋復鎮守寧夏○秋七月利階隘留關逮鎮遠
侯顧興祖下獄征蠻將軍都督山雲鎮守廣西○
八月大學士黃淮致仕○九月升至隘留關遇賊
死梁銘李震卒崔聚兵潰○冬十月通與利盟退
師○復李時勉翰林侍讀○十一月行在禮工部
左右侍郎李琦羅汝敬諭安南立陳暲爲王諸將
班師○皇長子生大赦○十二月張善伏誅○是
年南京戶部尚書兼掌吏部事師達卒○差科道
官清軍

戊申宣德三年春正月書諭阿魯台○二月立皇長
子祁某爲皇太子大赦○通兵退次南寧○段民
爲南京戶部侍郎尋改南京刑部○三月皇后胡
氏遜居別宮立貴妃孫氏爲皇后○夏四月黃福
爲行在工部尚書○廣西總兵山雲討平蠻寇○
魏驥爲試行在吏部侍郎○閏四月王通梁瑛陳
智李安方政戈謙山壽馬騏下詔獄籍其家蔡福
朱廣伏誅褒贈安南死事文武諸臣○五月琦汝
敬還利表陳暲卒乞守國俟命○汝敬復諭利訪
陳氏後○六月行在工部尚書吳中下獄尋釋之

○刑部尚書金純致仕○秋七月顧佐爲行在右都御史○八月皇子祁鈺生○革北京行部行後軍都督府○丁未帝東巡英國公張輔陽武侯薛祿帥師以從○九月帝出喜峰口擊兀良哈大破之遂班師○癸酉帝還京○冬十月陽武侯薛祿遂安伯陳瑛武進伯朱冕鎮守薊州永平山海○蹇義夏原吉輟部事○十一月城獨石遂棄開平○十二月福建樓濂反伏誅○是年勅南京刑部侍郎段民考察京官

配宣德四年春正月兩京地震○二月羅汝敬還

利貢方物○三月遣李琦諭利○夏四月郭璉爲吏部尚書○工部尚書黃福平江伯陳瑄經略漕運○寧王權上書謝罪○五月初設鈔關○寧王權請灌城田不許○六月郭資掌行在戶部事○列侯諸將轉餉開平○秋七月幸文淵閣○行在戶部上戶口登耗之數○劉觀有罪徙遼東○八月楊溥憂去尋起復直弘文閣○九月山雲討平柳潯賊○冬十月庚辰幸文淵閣戊子幸文淵閣○改張瑛爲南京禮部尚書陳山專授小內使書○甲午帝閱武近郊戊戌還京○十一月磔臧清

于市○列侯諸將帥師巡宣府○十二月

庚戌宣德五年春正月兩朝實錄成○少保戶部尚

書夏原吉卒○二月鎮朔大將軍陽武侯薛祿副

總兵恭順侯吳克忠左右叅將武進伯朱冕奉化

伯滕定率師巡邊○已未帝謁長陵獻陵○三月

已酉帝還京○黎利篡陳暲而自立琦還利表請

封○熊槩爲南京右都御史葉春行在刑部右侍

郎改江南民運爲兌運○夏四月加楊榮少傅○

尚書黃福總理淮北河南山東屯田○五月况鍾

何文淵爲蘇州温州知府○令追奪賊官誥勅○

六月南京副都御史吳訥致仕○置萬全都指揮

司○秋七月太保陽武侯薛祿卒○禮官請賀龍

駒瑞麥嘉禾皆不許○八月己巳朔日食○九月

初設巡撫于謙周忱爲行在兵工部右侍郎謙巡

撫河南山西忱巡撫江南直隸○嚴暄伏誅○乙

卯帝巡近郊己未還京○冬十月丙子帝巡近郊

戊寅度居庸關己卯獵岔道壬辰還京○丙申夜

蓬星見○十一月山雲討平慶遠蠻○十二月浙

江巡撫侍郎成均築捍海隄○閏十二月

辛亥宣德六年春正月張本卒○二月巡按江西御

亥

史陳祚下錦衣獄○趙儼伏誅○三月○夏四月
有星孛於東井○五月溧陽妖人伏誅○四川總
兵陳懷移鎮松藩○六月遣行在禮部右侍郎章
敞諭黎利權署安南國事○秋七月帝幸楊士奇
第○八月○九月熒惑犯南斗○冬十月丙午帝
巡近郊庚戌還京○十一月唐受伏誅○十二月
袁琦伏誅○大學士金幼孜卒

壬子宣德七年春正月朔日食○少詹事兼翰林學
士曾棨卒○二月行在工部右侍郎羅汝敬總督
陝西屯餉河渠事○三月○夏四月募商輸粟塞

下○五月○六月○秋七月○八月行在戶部尚
書黃福掌南京戶部事○令在京三品上官舉有
才行文學者○九月山雲爲都督同知仍鎮守廣
西○冬十月○十一月○十二月修祖陵孝陵○

癸丑宣德八年春正月○二月○三月賜曹鶴等進

士及第出身有差○山東旱饑○夏四月○五月
四川盜起副都御史賈諒討平之○六月平蠻將
軍都督方政副總兵蔣貴鎮守松藩○秋七月初
置武驤騰驤四衛○八月熒惑犯南斗○黃福兼
掌南京兵部事○閏八月彗出天倉○九月○冬

十月平江伯陳瑄卒○十一月左副總兵右軍都督僉事王瑜督理漕運鎮守淮安○十二月郭資卒○修南京宮殿○是年日本國王源道義卒遣使弔祭

甲寅宣德九年春正月○二月妖僧李臯謀反伏誅○南京刑部右侍郎段民卒○三月戊寅百官朝皇太子於文華殿○王驥爲行在兵部尚書○夏四月琦還黎利死利子麟遣人告喪○五月使祭黎利○六月震大祀壇門○秋七月○八月楊溥爲禮部尚書仍兼學士○瓦剌脫歡攻殺阿魯台

其子阿卜只俺來歸以爲中府左都督○僉都御史凌晏如卒○九月張瑛仍直文淵閣尋卒○癸未帝巡邊乙酉度居庸關丙戌獵岔道辛卯駐宣府巳亥大獵○冬十月丙午帝還京○侍郎章敞諭黎麟權署安南國事○陳敬宗爲南京國子祭酒○翰林學士沈度卒○十一月○十二月甲子帝不豫衛王瞻埏攝享太廟

癸卯宣德十年春正月癸酉朔帝不豫百官朝皇太子於文華殿○甲戌帝崩於乾清宮壬午皇太子

三馬系

馬



